



# **SOALAN LAZIM**

**PROGRAM SARINGAN COVID-19 BAGI PEKERJA ASING  
MENGUNAKAN KAEDAH RTK ANTIGEN**

**DI NEGERI SELANGOR, W.P. KUALA LUMPUR DAN LABUAN,  
NEGERI SEMBILAN, PULAU PINANG, DAN SABAH**

**31 DISEMBER 2020**

---

**1. APAKAH OBJEKTIF PROGRAM SARINGAN COVID-19 KEPADA PEKERJA ASING?**

Program saringan COVID-19 ke atas pekerja asing dilaksanakan bagi membantu usaha kerajaan membendung penularan wabak COVID-19 di dalam Negara khususnya dalam kalangan pekerja asing.

Program ini mewajibkan saringan COVID-19 kepada semua pekerja asing yang mencarum dengan PERKESO dan bekerja di negeri **Selangor, W.P. Kuala Lumpur dan Labuan, Negeri Sembilan, Pulau Pinang, dan Sabah**. Pelaksanaan program ini juga dilakukan selepas penilaian risiko yang dijalankan oleh Kementerian Kesihatan Malaysia mendapati risiko jangkitan adalah lebih tinggi dalam kalangan pekerja asing berbanding pekerja tempatan.

**2. APAKAH KAEDAH UJIAN SARINGAN BAGI PROGRAM SARINGAN COVID-19 KEPADA PEKERJA ASING?**

Ujian saringan bagi pekerja asing di bawah program ini akan menggunakan kaedah *Rapid Test Kit* (RTK) Antigen. Ujian ini melibatkan pengambilan sampel melalui calitan rongga hidung (*nasal swab*) yang dilakukan oleh petugas kesihatan terlatih. Pengujian calitan boleh dijalankan dengan segera di lokasi pengambilan sampel dengan menggunakan katrij yang akan mengesan kewujudan antigen virus COVID-19. Keputusan saringan melalui kaedah ini boleh diperolehi dalam masa yang singkat dan memudahkan pengesanan jangkitan COVID-19.

---

**3. APAKAH KRITERIA KELAYAKAN BAGI PROGRAM SARINGAN COVID-19 KEPADA PEKERJA ASING?**

Semua pekerja asing yang mencarum dengan PERKESO dan bekerja di negeri Selangor, W.P. Kuala Lumpur dan Labuan, Negeri Sembilan, Pulau Pinang, dan Sabah **layak menjalani ujian saringan di bawah program ini**. Setiap pekerja asing perlu menjalani ujian saringan COVID-19 hanya sekali sahaja dalam tempoh program ini.

**4. BILAKAH TARIKH KUATKUASA?**

Ujian saringan ini dijalankan secara berjadual dan berperingkat dengan memberi tumpuan kepada daerah-daerah yang berisiko tinggi, mulai 1 Disember 2020. Berikut adalah jadual pelaksanaan ujian saringan secara berkala di daerah-daerah yang dikenal pasti iaitu:

- a. Daerah Klang dan Seremban bermula pada 1 Disember 2020;
- b. Lain-lain daerah zon merah di Selangor (Hulu Langat, Petaling, Gombak, Kuala Langat, Sepang), seluruh WP Kuala Lumpur dan Pulau Pinang (Seberang Prai Selatan, Timur Laut, Barat Daya) bermula pada 9 Disember 2020;
- c. Seluruh Negeri Sabah, seluruh WP Labuan dan lain-lain daerah di negeri Selangor (Kuala Selangor, Hulu Selangor dan Sabak Bernam), Pulau Pinang (Seberang Prai Tengah dan Seberang Prai Utara) dan Negeri Sembilan (Rembau, Tampin, Port Dickson, Jempol, Jelebu dan Kuala Pilah) bermula pada 16 Disember 2020.

**5. SEKIRANYA PEKERJA PERNAH MENJALANI SARINGAN MELALUI KAEDAH RT-PCR, ADAKAH BELIAU BOLEH MEMBUAT SARINGAN SEMULA?**

Pekerja asing yang pernah menjalani saringan sebelum ini menggunakan kaedah RT-PCR, pekerja tersebut boleh menjalani saringan sekali lagi bagi ujian RTK Antigen.

---

**6. BAGAIMANAKAH PROGRAM SARINGAN COVID-19 KEPADA PEKERJA ASING INI DILAKSANAKAN?**

Ujian saringan dijalankan dengan kerjasama klinik dan hospital swasta secara berjadual dan berperingkat. Senarai panel yang boleh menjalankan ujian saringan RTK Antigen boleh dirujuk di <https://psp.perkeso.gov.my>. Ujian saringan ini akan menggunakan kaedah RTK Antigen yang diluluskan oleh Kementerian Kesihatan Malaysia dan kit ujian akan dibiayai oleh PERKESO. Majikan hanya perlu membiayai kos perkhidmatan yang dikenakan oleh klinik atau hospital.

**7. ADAKAH KOS SARINGAN BAGI PEKERJA-PEKERJA ASING YANG TIDAK MENCARUM DENGAN PERKESO JUGA AKAN DITANGGUNG OLEH PERKESO?**

Bagi pekerja asing yang bukan pencarum PERKESO, kos saringan perlu ditanggung sepenuhnya oleh pihak majikan.

**8. ADAKAH MAJIKAN PERLU MENGHUBUNGI KLINIK ATAU HOSPITAL UNTUK PENETAPAN JADUAL SARINGAN?**

Bagi mengelakkan kesesakan semasa saringan, majikan perlu menghubungi klinik atau hospital untuk menetapkan tarikh dan masa saringan. Senarai panel yang boleh menjalankan ujian saringan RTK Antigen boleh dirujuk di Direktori Panel di portal <https://psp.perkeso.gov.my>. Saringan boleh dijalankan sama ada di premis majikan atau di klinik/hospital dengan mematuhi garis panduan yang telah ditetapkan oleh PERKESO.

**9. ADAKAH SUBSIDI AKAN DIBAYAR BAGI SARINGAN YANG DIJALANKAN DI BAWAH PROGRAM SARINGAN COVID-19 KEPADA PEKERJA ASING?**

Tanggungjawab yang diperuntukan adalah bagi menanggung perbekalan kit ujian RTK Antigen kepada klinik dan hospital. Majikan hanya perlu membiayai kos perkhidmatan yang dikenakan oleh klinik atau hospital.

---

**10. ADAKAH SARINGAN BOLEH DIJALANKAN DI PREMIS MAJIKAN?**

Majikan boleh berbincang dengan klinik atau hospital yang menawarkan saringan untuk mengetahui sama ada saringan boleh dilakukan di tempat kerja. Kemudahan ini adalah bergantung kepada kapasiti dan kesesuaian serta perlu mematuhi SOP yang telah ditetapkan oleh KKM.

**11. ADAKAH MAJIKAN DIBENARKAN UNTUK BEROPERASI SETELAH PEKERJA MENJALANI SARINGAN?**

Majikan boleh beroperasi seperti biasa tertakluk kepada arahan lanjut daripada Kementerian Kesihatan Malaysia atau Jabatan Tenaga Kerja berdasarkan **keputusan ujian saringan COVID-19 yang dijalankan**.

**12. ADAKAH PEKERJA AKAN MENDAPAT KEPUTUSAN SARINGAN SETELAH MENJALANI SARINGAN?**

Klinik atau hospital yang menjalankan saringan akan mengeluarkan keputusan saringan kepada majikan dan pekerja.

**13. APAKAH YANG PERLU DILAKUKAN SEKIRANYA PEKERJA ASING BELUM MENDAFTAR ATAU MENCARUM DENGAN PERKESO?**

Majikan perlu mendaftarkan pekerja asing sebagai pencarum PERKESO sebelum melayakkan mereka menjalani ujian saringan ini. Bagi pekerja asing yang bukan pencarum PERKESO, kos saringan perlu ditanggung sepenuhnya oleh pihak majikan.

**14. APAKAH LANGKAH YANG PERLU DIAMBIL BAGI MENCEGAH JANGKITAN COVID-19 SEWAKTU PROSES UJIAN SARINGAN DIJALANKAN?**

Proses menjalani ujian saringan melibatkan ramai pekerja, dan boleh menyebabkan SOP pencegahan Covid-19 seperti penjarakan fizikal terjejas. Oleh itu, pekerja perlu sentiasa mematuhi SOP yang telah ditetapkan sewaktu menjalani ujian. Ujian yang dijalankan di premis majikan juga perlu mematuhi SOP yang telah ditetapkan oleh pihak KKM.

---

**15. BILAKAH PELAKSANAAN PROGRAM SARINGAN COVID-19 KEPADA PEKERJA ASING AKAN DITAMATKAN?**

Program ini dijangka tamat apabila situasi semasa penularan COVID-19 dalam kalangan pekerja asing adalah terkawal atau telah dibendung dengan sebaiknya dan juga berdasarkan penilaian risiko oleh Kementerian Kesihatan Malaysia. Kemudahan ini juga adalah tertakluk kepada sebarang arahan kerajaan berkenaan perkara tersebut.

**16. BAGAIMANAKAH PERKESO BOLEH DIHUBUNGI SEKIRANYA TERDAPAT PERTANYAAN LANJUT?**

Sekiranya anda mempunyai pertanyaan lanjut, sila hubungi PERKESO melalui talian 03-4264 5089 atau 1-300-22-8000, atau layari Portal PSP di <https://psp.perkeso.gov.my>.